

sine alicujus injuria fiat. Quantitas vero rei offerendæ ordinariæ in his oblationibus spontaneis arbitraria est, ut D. Thomas et omnes notant, licet consuetudine possit interdum etiam quantitas præscribi, ut supra notatum est. Dico autem non requiri specialem conditionem positivam, quia generatim, seu negative observare oportet, ut res oblata non habeat conditionem aliquam non decentem ad divinum cultum. Qua ratione apud Malachiam, d. c. 1, simpliciter dicitur esse malum, offerre Deo claudum aut cæcum, quia ex natura rei videtur esse contra reverentiam Deo debitam, vel quia ejus majestas videtur contemptui haberi, vel quia per talem oblationem non recte significatur perfectio Dei in efficiendis suis operibus. Regulariter autem, et secluso contemptu et scandalò, non videtur hoc peccatum grave, etiamsi ex avaritia vel negligentia procedat, quia oblatio est spontanea, et defectus rei oblata non est simpliciter contra substantiam oblationis, ut supponitur, sed contra perfectionem ejus, et licet aliquam indecentiam includat, regulariter levis est, ut si quis ad offerendum in ecclesia, et maxime in sacrificio, vile triticum aut vinum eligat; si vero eligeret jam corruptum, ut vinum factum acetum, gravis esset culpa, quia esset contra substantiam oblationis.

CAPUT VIII.

DE PRÆCEPTO SOLVENDI PRIMITIAS.

1. *Quid sint primitiæ.* — *Primitiæ an sint primi fructus, an meliores.* — Primitiæ sub oblationibus continentur, habent tamen specialem quamdam rationem et obligationem: et ideo aliquid de illis in particulari dicendum est, cum D. Thoma, d. q. 86, art. 4; Alex., 3 p., quæst. 52; primitiæ igitur dicuntur primi fructus frugum terræ, ut ex Deuter. 6 colligitur. Addit Hostiens. in Sum., Raim., et alii, esse primam partem fructuum Domino offerendam, sed non oportet hanc posteriorem particulam addere, quia nec ex vi vocis significatur, nec pertinet ad rationem primitiarum. Non enim ideo primitiæ sunt, quia Domino sunt offerendæ, sed potius, quia sunt primitiæ, id est, primi fructus frugum, ideo præcipiuntur Deo offerri. Potest autem dici fructus primus, vel origine seu tempore, quia prius maturescit, et ante alios colligitur, vel dignitate, quia est cæteris melior aut pinguior. Interrogari ergo potest an primitiæ

dicantur primi fructus tempore, vel bonitate, id est, optimi. Nam in modo loquendi Scripturæ, videtur esse in hoc aliqua ambiguitas; nam Num. 18 sic dicitur: *Primitias, quas roverint et obtulerint filii Israel, tibi dedi, etc.* Quæ autem istæ primitiæ, ita explicatur: *Omnem medullam olei, vini ac frumenti, quicquid offerunt primitiarum, tibi dedi.* Ubi medulla vocatur id, quod est optimum, et hoc ipsum nomine primitiarum significatur.

2. *Secunda solutio quæstionis.* — Dicendum tamen est, licet nomen primitiarum varium sit, et multiplex in Scriptura, ut late tractat Abulens., in c. 23 Matth., a q. 209, et Exod. 25, Num. 18, et sæpe alias, nihilominus, ut significat materiam propriam illius præcepti, de primitiis quotannis solvendis, non a dignitate, sed ab ordine temporis sumptum est, id est, non optimos fructus, sed primos significat. Ita enim explicatur statim in eod. c. 18 Num.: *Universa frugum initia, quæ gignit humus, et Domino deportantur, cedent in usus tuos;* et infra: *Quicquid primum erumpit de vulva, etc.* Itaque sicut primogenita dicuntur, primi fetus animalium, etiamsi optima non sint, ita primitiæ secundum ordinem originis considerantur, non secundum bonitatis gradum. Denique in præceptis tradendis, vox in propria significatione accipitur; primitiarum autem vox proprie significat primos in origine fructus; aliæ vero significationes metaphoricæ sunt. E converso autem iidem primitiarum fructus per quamdam metaphoram vocantur medulla, vel quia multum solent aestimari, vel quia ordinariæ solent esse præcipui, vel ut tales reputari. Et hoc significavit D. Thomas, d. quæst. 86, art. 4; infra vero aliam expositionem trademus. Circa hoc ergo primitiarum præceptum primo videndum est, quid jus naturæ statuatur; deinde quid fuerit in veteri lege præceptum, ac tandem quid in lege nova observandum sit.

3. *Aliqui dicunt esse primitias de jure divino naturali.* — *Glossa.* — Circa primum, aliqui existimant præceptum offerendi Deo primitias naturale esse, ac subinde pertinere ad jus divinum morale. Quod videntur sentire multi ex auctoribus, qui dicunt præceptum de solvendis decimis esse de jure naturali, quos sequenti capitulo referemus. Nam eodem fere modo loquuntur de præcepto primitiarum; nam primitiæ eodem modo censentur debitæ, quo decimæ, juxta Glossam, in § *His ita*, verb. *Et primitias*, post c. 1, 13, q. 8, quem sequitur Rebuf., tract. de Decim.,

q. 1, ex c. *Revertimini*, 16, q. 1. Et hoc videtur tenere Andr. Hispan., tract. de Decim., q. 1, n. 21. Dicunt enim non valere consuetudinem contra præceptum de solvendis primitiis, quia est contra gratitudinem, et honorem Deo debitum. Et potest hæc sententia suaderi ex usu antiquissimo honorandi Deum, primitias frugum vel cum proportionem primogenita pecorum ei offerendo; sicut de Abel legitur Genes. 4, obtulisse *Domino de primogenitis gregis sui*; et Plinius, lib. 18, cap. 2, refert Romanos olim non prius degustasse novas fruges, aut vina, quam sacerdotes primitias libassent. Et multa similia ex antiquitate refert Alex. ab Alexand., l. 5 Genial., c. 18; Tiraquel, de Primogen., in præfat., n. 65.

4. *Tria in primitiis consideranda.* — Sed hæc sententia, si de proprio præcepto intelligatur, probabilis non est. Tria enim in primitiis distingui possunt. Unum est, quod aliqua pars fructuum Deo in recognitionem beneficii offeratur; secundum est, ut illa pars sit primorum fructuum; tertium, ut sit in tanta quantitate. Quoad hoc tertium, omnes fatentur nihil esse determinatum de jure naturali in solutione primitiarum; imo nec de jure positivo divino aut humano id definitum est, sed arbitrio offerentium relinquitur, vel consuetudine interdum determinatur, ut videbimus. Unde in hoc differunt primitiæ a decimis, quod decima, in rigore sumpta, dicit certam partem aliquotam fructuum, ut vox ipsa præ se fert; primitia vero non dicit partem certæ quantitatis, etiam proportionalis, sed absolute primam partem fructuum. De secundo etiam manifestum est, nullum esse præceptum naturalis juris obligans ad colendum Deum per oblationem primorum fructuum, ut recte docuit D. Thomas, d. art. 4; quem omnes sequuntur, et Henr. Boic., in c. 1 de Decimis. Et fatetur etiam Rebuf. supra, n. 22, ubi hac ratione dicit præceptum primitiarum in lege veteri non fuisse morale, sed judiciale. Ac denique est communis et certa sententia; quia nulla ratio naturalis dicat esse ad honestatem morum necessarium offerre Deo primos fructus, quia aliis modis et oblationibus potest coli Deus, et ostendi gratitudo ad ipsum, quantum satis sit ad non peccandum, ut ex dictis in c. 3 aperte constat, et amplius statim declarabitur.

5. *Quomodo primitiæ dicantur de jure naturali.* — De tertio vero ait D. Thomas supra, *pertinere ad jus naturale, ut homo de rebus suis*

aliquid Deo exhibeat in ejus honorem. Et sequitur Cajetanus ibi, et Anton., 2 p., tit. 4, c. 3, § 3, et late Didac. Per., in l. 1 Ord., tit. 5, l. 5. Et in re consentit Abulens., Matth. 23, q. 221, nam fatetur de jure naturali esse, ut aliquid detur Deo in recognitionem; unde sine causa reprobatur D. Thomæ sententiam, cum revera nihil aliud dicat. Verumtamen etiam illud dictum D. Thomæ explicandum est, juxta dicta in c. 3, dici de jure naturali, non quia sit de absoluto præcepto legis naturalis, cum præceptum naturale colendi Deum possit aliis modis impleri, si omnis determinatio juris positivi excludatur. Sed dicitur pertinere ad jus naturale, quia habet quamdam honestatem et congruentiam moralem, valde consentaneam naturali rationi; et quia ipsa natura valde inclinatur ad hunc modum colendi Deum, et recognoscendi eum ut supremum benefactorem, et auctorem bonorum fructuum.

6. *Objectionibus impugnatur.* — *Satisfit.* — Occurrit vero statim objectio, quia hoc modo etiam primitiarum oblatio est de jure naturali; quia etiam in oblatione primorum fructuum est peculiaris congruitas, et aptitudo ad significandum gratum animum ad Deum, tanquam ad primum auctorem omnium fructuum, et maxime benefactorem et supremum dominum, cujus est terra, et plenitudo ejus. Item inter homines est peculiare signum benevolentiae donare amico primos fructus arboris; et si id fiat ab inferiori respectu superioris, est signum peculiaris reverentiae, et hoc fit dictante et inclinante natura; ergo in dicto sensu dici potest de jure naturali; ergo idem a fortiori verum est de oblatione primitiarum facta Deo. Denique hoc ostendit antiquitas hujus consuetudinis, etiam inter gentes, ut diximus. Respondeo hæc argumenta probare locutionem illam in bono sensu expositam posse ut veram admitti, nimirum oblationem primitiarum etiam quoad eam circumstantiam, scilicet, ut de primis fructibus solvatur tributum, esse de jure naturæ, non ut simpliciter necessarium, sed ut honestum, congruum, et conforme naturali dictamini et propensione. Neque hoc negat D. Thomas, nam in eodem articulo, solut. ad 1, ait hujusmodi oblationem primitiarum esse retentam in lege gratiæ, quia est secundum dictamen rationis naturalis. Inter has ergo circumstantias, solum potest differentia hæc constitui, quod offerre aliquam partem fructuum abstrahendo a prima, vel alia qualibet, generalius quidem

est, et ideo immediatus dicitur a ratione naturali, et moralem quamdam necessitatem seu congruentiam habere videtur majorem, quam oblatio ex primitiis fructuum.

7. *An primitiæ prout a sacrificio distinguuntur sint de jure naturæ.* — Interrogat autem Cajetanus, in dicto articulo, an oblatio primitiarum, vel alicujus partis fructuum, intelligatur esse hoc modo de jure naturæ, etiam ut est distincta a sacrificio, vel solum ut in ipso sacrificio fieri et includi potest; et respondet intelligendum id esse de tali oblatione, ut distincta a sacrificio, quia in hoc sensu de illa tractat D. Thomas, et in alio sensu nihil suo discursu conficeret. Addit tamen Cajetanus sacrificium esse quasi per se de jure naturali, oblationem vero primitiarum, ut distinctam a sacrificio, solum esse de jure naturali, supposita indigentia ministrorum. Sed dico, in rigore juris naturalis stando, unica oblatione sacrificii satisfieri posse rationi naturali, dictanti Deo esse offerendam aliquam partem fructuum, etiam primam, in recognitionem domini et beneficiorum ejus, sive intelligatur hoc dictari ut necessarium, sive ut congruum et consentaneum rationi naturali. Patet, quia primitiæ directe et proxime Deo ipsi offeruntur in cultum et honorem, et non ministris ejus, licet consequenter ad usus eorum applicari soleant, quod sane pendet ex institutione; nam possent etiam pauperibus applicari, vel permanenter conservari, aut suspendi in signum honoris, donec per sese consumerentur et perirent. In quo differunt primitiæ a decimis, quæ directe et proxime ministris solvuntur, et conveniunt cum sacrificio, ex sententia ejusdem D. Thomæ et omnium. Ergo primitiæ fructuum possunt simul et Deo offerri, et in oblatione ipsa aliquid sacrum circa ipsas exerceri; ergo illa unica actione posset in rigore satisfieri, et cultui sacrificandi, et recognitioni divini beneficii per oblationem primitiarum: non enim est de ratione hujus recognitionis, ut oblatio primitiarum simplex sit, et sine aliqua consecratione; quin potius quo actio fuerit magis sacra, eo aptior erit ad gratias Deo agendas.

8. *Obligationi primitiarum et sacrificii per unam actionem posse satisfieri.* — Nec etiam est necessarium ut primitiæ Deo oblata salvæ conserventur, sed possent comburi, vel alio modo consumi in Dei honorem; non enim offeruntur Deo quia illis egeat, sed solum in signum reverentiæ et gratitudinis. Et quod cedant, vel cedere possint in usum ministrorum,

est per accidens, nam ex decimis vel aliunde possent sustentari. Nec denique obstat quod sacrificium et primitiæ sub diversis rationibus offerri Deo videantur; sacrificium enim Dei majestatem et excellentiam secundum se respicit et protestatur; oblatio autem primitiarum, ipsius beneficentiam et singularem providentiam recognoscit. Nam licet hoc ita sit, utrumque potest eadem oblatione sacra significari: illud, quatenus in Dei honorem res consumitur; hoc vero, quatenus materia ipsa oblata ex primis terræ fructibus ad Deum honorandum offertur. Atque hoc modo utrique rationi et obligationi satisfecit Abel, offerendo Deo primogenitos gregis sui, et illos mactando et sacrificando. Et idem intelligi potest in oblatione Cain ex fructibus terræ; potuit enim esse ex prima parte fructuum, et per modum sacrificii comburi. Et in lege veteri, oblatio primitiarum non fiebat sine aliquo genere sacrificiationis, ut mox dicemus. Et in nostro divino sacrificio, etiam offerimus Deo primitias omnium beneficiorum Dei, quia Christum offerimus, qui est primogenitus mortuorum, et primitiæ resurgentium, et primus prædestinatus in gloriam nostram.

9. *Oblationem primitiarum distinctam a sacrificio fieri, consentaneum est juri naturæ.* — Nihilominus tamen dicendum etiam est, consentaneum esse juri naturali, ut præter sacrificium proprium offerantur Deo primitiæ, oblatione distincta, etiam sine indigentia ministrorum. Declaratur et probatur, quia non dicitur hoc esse de jure naturali, quia præceptum illo jure, sed quia ratio naturalis ad id inclinatur, dictando esse honestum et congruum, ut jam explicatum est. At ratio naturalis inclinatur ad colendum Deum, non tantum uno modo, sed multiplici; non tantum corde, sed etiam ore; nec tantum ore, sed etiam gestibus corporis; neque his solum, sed etiam aliis actionibus et rebus externis; ergo, cum sacrificatio et oblatio primitiarum ad diversos fines ordinentur, satis consentaneum rationi est, ut rebus et signis, seu oblationibus diversis fiant; nec esset ridiculum (ut Cajetanus objicit) offerre Deo simpliciter primitias, etiam sine indigentia ministrorum; tum quia possent prius simpliciter offerri in signum gratitudinis ad Deum, et postea ab ipsis offerentibus consumi, non ita ut consumptio esset veluti pars actionis sacræ, sed solum ad propriam sustentationem, sicut David comedit de panibus propositionis; tum etiam quia possent suspendi in loco Deo dicant, vel in propria domo, in signum et memo-

riale permanens beneficiorum Dei, sicut nunc interdum et spontanea pietate fieri videmus in floribus, et in nonnullis primis fructibus. Et hæc sunt satis de oblatione primitiarum, stando in jure naturæ.

10. *De præcepto primitiarum in lege veteri.* — De tempore autem legis veteris, certum est sæpius latum esse præceptum de primitiis Deo offerendis. In quo præcepto primitiis continebatur, quidquid ex vi legis naturalis desiderari poterat, ut per se constat; addebantur autem plures circumstantiæ, vel determinationes, quas ratio naturalis vel non exigit, vel etiam non diceret per se solum; sed ex peculiaribus occasionibus fuerunt illi populo, tempori, ac legi accommodatæ, secundum ordinem divinæ sapientiæ. Nam imprimis præceptum fuit illi populo peculiari modo offerre Deo primogenitos, tam de hominibus, quam de jumentis, Exod. 13. Quod fortasse ratio naturalis non assequeretur, præsertim quoad proprios filios, nec etiam forte extendetur ad primos fœtus omnium aliorum animalium; sed satis esse crederet aliquos offerre, præsertim ex his pecudibus quæ ad cibum, et vestitum corporis humani maxime inserviunt. Deinde ampliatum est illud præceptum, ad primitias omnium frugum, Exod. 23, 34, Numer. 18, Deut. 16. Unde Augustinus, libro Quæstionum in Num., q. 32, distinguit primitivos fructus animalium a primitiis, quas dicit fuisse ex primis fructibus terræ jam collectis, nam in dictis locis hæc vocantur *primitiæ frugum terræ*; generalius tamen nomen *primitiarum*, etiam primogenita animalium comprehendere potest. Addit vero Abulensis, sub nomine primitiarum non fuisse comprehensos in veteri lege fructus arborum; nam ex primitiis fructuum arborum, ait, nihil erat debitum Deo, quod non ex Scriptura, sed solum ex quadam traditione Rabbiorum confirmat; oppositum vero sentit Augustinus, d. q. 32 in Num., ibi: *Vel de arbore, vel de vite.* Et videtur plane colligi ex allegatis locis Scripturæ; in quibus sic dicitur: *Primitias frugum terræ tuæ offeres*: constat autem nomine frugum etiam fructus arborum comprehendi in omni proprietate latini sermonis, unde Vatabl. vertit: *Principium primitivorum fructuum terræ tuæ inferes in domum Domini Dei tui*; at fructus arborum, fructus sunt terræ, ut notum est: non potest ergo illa limitatio admitti, maxime cum Deut. 26, addatur distributio *de cunctis frugibus terræ*, seu *cunctorum fructuum telluris*. Erat ergo materia hujus

præcepti universalis de omnibus fructibus, qui ad sustentationem corporis humani deservire poterant.

11. *Multiplex primitiarum oblatio.* — Tertio, non una tantum erat primitiarum oblatio, sed multiplex: unde Augustinus, d. q. 32, præter primogenita animalium, distinguit duplices primitias frugum terræ. Quædam specialiter offerebantur ex ipsis fructibus arborum aut segetum ante generalem fructuum collectionem; aliæ vero solvebantur de fructibus jam redactis ab agro. De prioribus primitiis videtur esse sermo Levit. 2, cum dicitur: *Si obtuleris munus primitiarum tuarum Domino de spicis adhuc virentibus, torrebis igni, et confringes in morem farri, et sic offeres primitias tuas Domino.* Et ex illo loco colligitur, illam non fuisse simplicem oblationem, sed per modum sacrificii, ut notat D. Thomas, 1. 2. quæst. 102, art. 3, ad 12. De eodem primitiarum genere videtur fuisse manipulus spicarum, qui Lev. 23 ferri præcipitur ad sacerdotem, tanquam primitiæ messis in festo Azimorum. Item panes etiam primitiarum, qui offerebantur in Pentecoste, ut ibidem habetur. At vero aliæ primitiæ offerebantur vel dabantur sacerdotibus ex fructibus jam collectis et congregatis in dolio, vel in area, aut alio simili loco, et de his primitiis videtur specialiter sermo esse Deut. 26, cum dicitur: *Tolles de cunctis frugibus terræ*, etc. Quod fieri solitum fuisse in festo Tabernaculorum, notat Abulensis.

12. *Primitiarum quantitas non certa.* — *Dubitationi satisfit.* — Itaque ante decimarum computationem et exactionem, aliquid pro primitiis solvebatur, quod non erat in determinata quantitate taxatum, sed pro arbitrio solventium dabatur¹. Usu autem receptum erat, ut ex fructibus terræ ad summum daretur pars quadragesima, et ad minimum daretur sexagesima, vel inter hæc duo extrema, pro voluntate offerentium, ut Hieronymus tradit, Ezech. 45, et ex eo refertur in cap. 1 de Decimis. Addit vero Hieronymus, propter sacerdotum avaritiam et duram exactionem, determinatam esse ibi ab Ezechiele propheta quantitatem offerendam in primitiis, quod in lege prætermisum fuerat. Dices: quomodo poterant primitiæ ex fructibus omnibus jam collectis deduci, cum illic jam non posset fieri distinctio inter primos et cæteros fructus? Respondeo, vel tunc quantitatem aliquam

¹ Vide Abulens.

fuisse solutam loco primitiarum, etiamsi non fuisset prima, quæ collecta vel maturata fuerat, vel debuisse esse primam partem, quæ ex tali cumulo extraheretur, vel certe tunc locum habet, ut ex optimis fructibus pars aliqua eligeretur, quæ pro primitiis penderetur.

13. *Quæ causa offerendi primitias in lege veteri.* — Quarto, habebat hæc primitiarum oblatio peculiarem determinationem in illa lege ex parte causæ, tum quia non tantum offerebatur in recognitionem generalium beneficiorum Dei, qui et terram ipsam hominibus dedit, et fructus ejus multiplicat, sed specialiter in memoriam peculiarium beneficiorum illi populo collatorum, tam in liberatione de terra Ægypti, quam in donatione terræ promissionis, ut ex allegatis locis constat, præsertim Deut. 26; tum etiam quia peculiariter applicatæ fuerunt primitiæ Aaron et filiis ejus, Num. 18. Rationem autem illius applicationis reddit divus Thomas, d. art. 4, quia primitiæ singulariter offerebantur tanquam supremo benefactori; et quia sacerdos est sequenter et specialis intercessor ad Deum pro populo, ideo peculiariter et in signum majoris dignitatis applicatæ fuerunt sacerdotibus. Levitis autem tanquam inferioribus decimæ donatæ fuerunt; ipsi vero etiam decimas decimarum sacerdotibus tribuebant, quæ nomine etiam primitiarum aliquando in Scriptura appellantur. Et hæc de veteribus primitiis nostræ intentioni sufficiunt; alia legi possunt in Abulensi, et aliis expositoribus veteris testamenti.

14. *In lege gratiæ est præceptum solvendi primitias.* — Ultimo ergo dicendum superest de tempore legis gratiæ. De quo primo certum est latum esse in Ecclesia Christi præceptum aliquod, solvendi primitias Deo. Ita docent Theologi omnes, et Canonistæ; et Glossa supra citata, in c. 13, q. 2, primitias æquiparat decimis quoad præcepti obligationem, et idem tradit Glossa, in cap. 1, de Decimis, verb. *In primitiis*, et colligitur ex Hieronymo, in eodem textu relato. Et hoc ad minimum affirmat Malach. 3, et refertur in c. *Revertimini*, 16, q. 1. Idemque supponit Gregorius VII, in c. *Decimas*, 16, q. 7; et Origenes, dicta hom. 41 in Num.; et Ambrosius, serm. 33. Favent etiam Concilium Arelaten. III, c. 9, et Concilium Foro juli., cap. 14.

15. *Hoc præceptum non durat in Ecclesia ex vi legis veteris.* — Secundo vero etiam est certum, hoc præceptum non durare in Ecclesia ex vi præcepti legis veteris; quia (ut osten-

dimus) illud non fuit morale, seu naturale, sed mere positivum, sive judiciale fuerit, sive (quod magis videtur) cæremoniale: at illa lex quoad utraque præcepta cessavit, ita ut nec observari possit ratione antiquæ obligationis, nec retineri, seu renovari quoad cæremonias, quæ specialiter ad illum populum pertinebant. Unde fit ut solutio primitiarum, quæ in nova lege retinetur, abstrahat ab omni peculiari determinatione veteris legis, quia non præcipiuntur primitiæ in recognitionem beneficiorum liberationis ex Ægypto, aut donationis terræ promissionis, sed præcipue ad Ecclesiæ sumptus, et consequenter in recognitionem quasi naturalem beneficiorum Dei, et providentiæ ipsius. Nec determinatio quantitatis primitiarum olim introducta, modo a Hieronymo relato, nunc durat, sed omnino arbitraria est. Nec applicatio specialis sacerdotibus facta nunc retinetur, sed indifferenter primitiæ, cum decimis, clericis, ecclesiis, et pauperibus dispensantur. Denique hæc primitiarum solutio non videtur nunc in Ecclesia retineri per modum propriæ oblationis, quæ directe et proxime Deo fiat, sed per modum tributum ad onera Ecclesiæ sustentanda, quia, ubicumque in jure fit mentio primitiarum, in hunc finem præcipue instituta esse declaratur, eodem modo quo decimarum solutio, nec in Ecclesia est aliquis usus aliter offerendi primitias in templo vel ad altare. Et ita omnia, quæ in illo præcepto veteri cæremonialia fuerunt, in lege nova cessarunt. Et consequenter sublata est illa multiplex primitiarum oblatio, quia tota illa in cæremoniarum ritu fundabatur. Quamvis non propterea prohibitum sit, quin manipulus spicarum vel aliorum fructuum possit in Ecclesia offerri, vel suspendi in signum gratitudinis et gratiarum actionis, dummodo ex devotione, non ex ritu legis id fiat, quia illud per se morale est, et nullum vestigium superstitionis habet.

16. *Obligationem primitiarum posse consuetudine variari et auferri.* — Tertio, hinc constat obligationem hanc solvendi primitias, posse consuetudine non solum minui, variari et augeri, sed etiam omnino auferri. Quod affirmant Doctores in 1 puncto citati, contra Rebuff. et Andream Hisp. Estque sententia communis, et clara quoad priorem quidem partem; quia in tali præcepto nulla quantitas determinata est; ergo de se est arbitraria; ergo potest consuetudine determinari; ergo et variari, vel in diversis locis, vel in eodem, pro diversis temporibus; nam humanæ con-

suetudines sunt variabiles, etiam sine malitia. Quoad alteram vero partem patet, quia consuetudo potest prævalere contra legem humanam. Idem a fortiori constabit ex his, quæ de decimis statim dicemus, est enim eadem ratio. Unde, quia (ut dixi) primitiæ hoc habent commune cum decimis, quod propter sustentationem ministrorum exigantur, semper subintelligendum est tunc valere dictam consuetudinem, quando ad sustentationem ministrorum primitiæ non sunt necessariae, nec ad alia Ecclesiæ onera sustentanda; tamen, quia regulariter satis provisum his est, aut provideri potest per alias oblationes, et decimas, et possessiones, seu redditus ecclesiasticos, ideo, moraliter loquendo, talis consuetudo valet. Imo ex communi sententia Doctorum, in hac materia pro regula hujus obligationis habenda est tam quoad gradum obligationis, quam quoad quantitatem solvendam, et quoad personas quæ ad primitias solvendas obligantur, et quoad loca vel personas quibus reddendæ sunt, ut sumitur ex Innocentio et aliis, in c. 1 de Decimis; Sylvest., verb. *Decima*, quæst. 1, circa finem, ubi alios refert; unde quæ de Decimis quoad hanc partem dicturi sumus, ad primitias poterunt applicari.

CAPUT IX.

DE PRÆCEPTO SOLVENDI DECIMAS, AN SIT IN EVANGELICA LEGE.

1. *Præceptum hoc est in Ecclesia, et ad virtutem religionis pertinet.* — Præceptum hoc esse nunc in Ecclesia, tanquam certum supponimus; quinque enim Ecclesiæ præcepta fidelibus communia, etiam inter ipsa fidei rudimenta traduntur, et quintum eorum est de decimis solvendis, sicut de primitiis diximus; et statim allegabimus jura in quibus fundatur. Deinde præceptum hoc ad religionis virtutem pertinere, supponit divus Thomas 2. 2, quæst. 87, et cum eo Theologia omnis. Quod non caret aliqua difficultate, quia videtur potius pertinere ad justitiam; sed explicando modum et fundamentum illius præcepti, explicabimus quomodo id verum sit. Nunc solum supponimus tanquam manifestum, hoc præceptum trahere necessitatem suam a virtute religionis, et a quibusdam actibus ejus, tanquam ex primaria radice. Dictum est enim ad officium religionis pertinere, ut sit in Ecclesia sacrificium, et cætera omnia, quæ ad illius religio-

nem, et debitum cultum communem et publicum, Dei necessaria sunt, ad quem etiam pertinent omnia sacramenta et sacramentalia. Hinc ergo factum est, ut in christiana republica sint maxime necessarii ministri ad hoc sacrificium, et ad hunc Dei cultum specialiter deputati, quibus consequenter spiritualis cura, et regimen animarum peculiariter commissum est, quia medio sacrificio et sacramentis, simul cum vera fide et verbo Dei, animarum salus procuratur.

2. *Quale fuerit in Ecclesia instituendi decimas fundamentum.* — Duo distinguunt Doctores in decimis. — Hoc ergo fuit primum decimarum fundamentum: nam hi Ecclesiæ ministri corporali sustentatione indigent, et non debent a divino cultu et aliis spiritualibus muneribus abstrahi, ut sibi necessaria ad vitam transigendam procurent; tum quia neque id erat decens, vel conveniens ad divinum cultum, neque ad bonum animarum erat utile; tum etiam quia ratio postulat ut qui laborant aliis spiritualia ministrando, ab eisdem corporaliter alantur, unde est illud Pauli, 1 ad Cor. 9: *Si nos vobis spiritualia seminamus, magnum est si carnalia vestra metamus?* et juxta alia testimonia et jura, quæ infra referemus. Hinc Doctores omnes duo distinguunt in decimis solvendis: unum est, ut ministris ecclesiasticis congrua sustentatio tribuatur; aliud est, ut ad hunc finem designetur decima pars fructuum, et illa reddi præcipiatur. Nam primum de se abstrahit a quota parte, ut vocant; posset enim esse major vel minor ad sustentandos ministros necessaria. Unde, si de illa tantum congrua sustentatione sermo esset, vel nihil vel parum difficultatis haberet, quia ex suppositione facta, et ex tali statu republicæ fidelis, ratio ipsa naturaliter dicitur illam sustentationem esse debitam, lege non tantum religionis, sed etiam naturalis justitiæ, ad quam pertinet illud Pauli, citato loco: *Quis militat suis stipendiis unquam?* Et illud: *Non alligabis os bovi trituranti?* Et illud: *Qui in sacrario operantur, quæ de sacrario sunt, edunt: et qui altari deservit, cum altari participat.* Hic autem non de sustentatione in genere, sed de propria decima tractamus.

3. *Triplex decimarum distinctio proponitur.* — Est igitur quæstio an præceptum solvendi decimam partem fructuum naturale aut positivum, divinum aut humanum sit. Quia vero, ad intelligendas opiniones et ad claritatem materiæ, oportet terminos exponere, ideo advertere necesse est, duplices, vel triplices de-